

VENDIM
Nr. 86, datë 27.3.2026

MBI NJË NDRYSHIM NË “RREGULLOREN E LIDHJEVE TË REJA NË SEKTORIN E GAZIT NATYROR”, MIRATUAR ME VENDIMIN E BORDIT TË ERE-s NR. 176, DATË 14.11.2019

Në mbështetje të nenit 16, të ligjit nr. 43/2015, “Për sektorin e energjisë elektrike”, të ndryshuar; të neneve 13, 16 dhe 17, të ligjit nr. 102/2015, “Për sektorin e gazit natyror”, të ndryshuar; të nenit 144, të ligjit nr. 44/2015, “Kodi i Procedurave Administrative i Republikës së Shqipërisë”; të vendimit të Bordit të Entit Rregullator të Energjisë (ERE) nr. 27, datë 1.3.2013, “Për miratimin e përjashtimit me kushte të TAP AG nga zbatimi i neneve 9, 32 dhe 41, paragrafët 6, 8 dhe 10, të Direktivës 2009/73/KE për projektin Trans Adriatic Pipeline”, i ndryshuar; të vendimit të Bordit të ERE-s nr. 64, datë 13.6.2013, “Për miratimin e Opinionit të Përbashkët të Rregullatorëve mbi aplikimin e TAP AG për përjashtim (*Final Joint Opinion*)”; të vendimit të Komisionit Evropian C(2013) 2949 final, datë 16.5.2013; të “Rregullores së lidhjeve të reja në sektorin e gazit natyror” miratuar me vendimin e Bordit të ERE-s nr. 176, datë 14.11.2019; si dhe të nenit 15, të “Rregullores për organizimin, funksionimin dhe procedurat e ERE-s”, miratuar me vendimin e Bordit të ERE-s nr. 96, datë 17.6.2016; Bordi i ERE-s, në mbledhjen e tij të datës 27.3.2026, mbasi shqyrtoi relacionin e përgatitur nga Drejtoria Juridike dhe Zgjidhjes së Mosmarrëveshjeve dhe Drejtoria e Rregullimit të Gazit Natyror me nr. 403/1 prot., datë 24.3.2026, “Mbi miratimin e kërkesës së shoqërisë ‘Trans Adriatic Pipeline AG’ (TAP AG) për ndryshimin e ‘Rregullores së lidhjeve të reja në sektorin e gazit natyror’”, miratuar me vendimin e Bordit të ERE-s nr. 176, datë 14.11.2019”,

konstatoi se:

- Shoqëria “Trans Adriatic Pipeline AG” (TAP AG), me shkresën nr. 403 prot., datë 28.1.2026, ka paraqitur kërkesë për ndryshimin e “Rregullores së lidhjeve të reja në sektorin e gazit natyror”, miratuar me vendimin nr. 176, datë 14.11.2019, me qëllim përfshirjen në këtë akt të një dispozite të posaçme që përjashton TAP AG nga fusha e zbatimit të saj.

- TAP AG operon mbi bazën e një kuadri të posaçëm rregullator, të konsoliduar përmes vendimit të Komisionit Evropian C(2013) 2949 final, datë 16.5.2013, si dhe Opinionit të Përbashkët Përfundimtar të Autoriteteve Rregullatore të Shqipërisë, Italisë dhe Greqisë, të datës 6 qershor 2013, që parashikon përjashtimin nga disa detyrime të Paketës së Tretë të Energjisë.

- Me vendimin nr. 27, datë 1.3.2013, ERE ka miratuar përjashtimin me kushte të TAP AG nga zbatimi i kërkesave të neneve 9, 32 dhe 41, të Direktivës 2009/73/KE, ndërsa me vendimin nr. 64, datë 13.6.2013, është miratuar Opinionit i Përbashkët i Rregullatorëve mbi këtë përjashtim.

- TAP AG është certifikuar si operator i pavarur i sistemit të transmetimit me vendimin nr. 36, datë 31.3.2016 dhe është licencuar në veprimtarinë e Transmetimit të Gazit Natyror me vendimin nr. 15, datë 31.1.2019.

- Regjimi i lidhjes në infrastrukturën e TAP AG nuk ndjek procedurat dhe mekanizmat e parashikuar në “Rregulloren për lidhjet e reja në sektorin e gazit natyror”, pasi lidhjet në këtë infrastrukturë realizohen përmes mekanizmave specifike të “Market Test”, të bazuar në kërkesën e tregut dhe në angazhimin e palëve të treta për mbulimin e kostove.

- Rregullorja në fuqi është hartuar për operatorët e rrjeteve kombëtare të transmetimit dhe shpërndarjes, dhe nuk reflekton natyrën specifike të operimit të TAP AG, të cilit më herët i është

miratuar kërkesa për përjashtimin sipas disa kushteve nga zbatimi i kërkesave të neneve 9, 32 dhe 41, të Direktivës 2009/73/KE.

- Vendimi i Bordit të ERE-s nr. 176, datë 14.11.2019, për miratimin e “Rregullores së lidhjeve të reja në sektorin e gazit natyror”, është paraprirë nga procesi i konsultimit me palët e treta, shqyrtimin e argumenteve dhe arsyetimin e vendimmarrjes. Ndër të tjera, në këtë vendim në pjesën konstatime evidentohet korrespondenca e datës 27.10.2019, ku citohet se TAP-i nuk kërkohet të sigurojë lidhje direkte për përdoruesit fundorë, TAP-i lidhet vetëm me OST-të kombëtare. TAP-i nuk kërkohet të sigurojë lidhje direkte për përdoruesit fundorë, TAP-i lidhet vetëm me OST-të kombëtare. Kjo vijon si nga ligji parësor i BE-së, ashtu edhe nga korniza specifike ligjore e TAP-it, e zhvilluar në përputhje me përjashtimin e dhënë TAP-it në vitin 2016.

- Sa i përket kërkesës së TAP AG për heqjen e referencës ndaj korrespondencës së datës 27.10.2019 nga pjesa konstatuese e vendimit nr. 176/2019, kjo kërkesë vlerësohet të mos pranohet, pasi pjesa arsyetuese e aktit administrativ përbën element thelbësor të ligjshmërisë procedurale ku pasqyrimi i komenteve të palëve garanton transparencën dhe dokumenton procesin vendimmarrës, ndërsa heqja e kësaj reference do të cenonte gjurmën dokumentare të procedurës, për më tepër që qëndrimi i TAP AG rezulton i marrë në konsideratë në vendimin nr. 176/2019.

- Me vendimin nr. 27, datë 1.3.2013, ERE ka miratuar përjashtimin me kushte të TAP AG nga zbatimi i kërkesave të neneve 9, 32 dhe 41, të Direktivës 2009/73/KE, ndërsa me vendimin nr. 64, datë 13.6.2013, është miratuar Opinioni i Përbashkët i Rregullatorëve mbi këtë përjashtim.

- Në kuadër të rishikimit të këtij vendimi konstatohet referimi i përjashtimit të dhënë TAP AG në vitin 2016. Nga analiza e vendimmarrjeve, në lidhje me operimin e TAP AG, rezulton se ky përjashtim është i lidhur me vendimin e Bordit të ERE-s nr. 27, datë 1.3.2013, vendimin e Komisionit Evropian C(2013) 2949 final, datë 16.5.2013, si dhe Opinionin e Përbashkët Përfundimtar të Autoriteteve Rregullatore të Shqipërisë, Italisë dhe Greqisë, të datës 6 qershor 2013. Si të tillë lind e nevojshme të bëhet korrigjimi i vitit referues në këtë paragraf të vendimit, përkatësisht viti 2016, korrigjohet me vitin 2013.

- Në përputhje me nenin 113, të ligjit nr. 44/2015, “Kodi i Procedurave Administrative të Republikës së Shqipërisë”, i cili parashikon se një akt administrativ mund të ndryshohet nga organi publik që ka kompetencë për ta nxjerrë atë, me një akt të ri me shkrim, vlerësohet që, në nenin 1, të rregullores nr. 176, datë 14.11.2019, të shtohet një dispozitë e posaçme që përjashton TAP AG nga fusha e zbatimit të saj, me përmbajtje si vijon: “Përjashtimisht kjo rregullore nuk është objekt zbatimi nga TAP AG për gjatë të gjithë kohës së zbatimit të vendimit nr. 27, datë 1.3.2013, ‘Për miratimin e përjashtimit të kushtëzuar të kompanisë TAP AG prej kërkesave të neneve 9, 32 dhe 41 (6), (8) dhe (10) të Direktivës 2009/73/EC, për projektin Trans Adriatik Pipeline’” dhe vendimit nr. 64, datë 13.6.2013, “Për miratimin e dokumentit ‘Opinion Përfundimtar i Përbashkët i Rregullatorëve të Energjisë mbi Aplikimin e TAP AG për Përjashtim’”.

- Ky ndryshim vjen si pasojë e regjimit të posaçëm rregullator që i është njohur shoqërisë “Trans Adriatic Pipeline AG” (TAP AG), në bazë të përjashtimit të dhënë nga detyrimet e parashikuara për aksesin e palëve të treta në infrastrukturë (*third party access*), sipas nenit 36 të Direktivës 2009/73/EC. Për rrjedhojë, TAP AG operon jashtë kuadrit standard të aksesit të hapur dhe jodiskriminues në rrjet, çka justifikon përjashtimin e saj nga fusha e zbatimit të “Rregullores për lidhjet e reja në sektorin e gazit natyror” sikurse dhe pranuar në vendimin nr. 176/2019.

Për gjithë sa më sipër, Bordi i ERE-s

VENDOSI:

1. Në “Rregulloren për lidhjet e reja në sektorin e gazit natyror”, miratuar me vendimin e Bordit të ERE-s nr. 176, datë 14.11.2019, në nenin 1, shtohet paragrafi me përmbajtje si vijon: “Përjashtimisht kjo rregullore nuk është objekt zbatimi nga TAP AG për gjatë të gjithë kohës së zbatimit të vendimit nr. 27, datë 1.3.2013, ‘Për miratimin e përjashtimit të kushtëzuar të kompanisë TAP AG prej kërkesave të neneve 9, 32 dhe 41 (6), (8) dhe (10), të Direktivës 2009/73/EC për projektin Trans Adriatik Pipeline”” dhe vendimit nr. 64, datë 13.6.2013, “Për miratimin e dokumentit ‘Opinion Përfundimtar i Përbashkët i Rregullatorëve të Energjisë mbi Aplikimin e TAP AG për Përjashtim””.

2. Drejtoria e Rregullimit të Gazit Natyror të njoftojnë shoqërinë TAP AG dhe palët e interesit për këtë vendim.

Ky vendim hyn në fuqi me botimit në Fletoren Zyrtare.

Çdo palë e përfshirë në këtë procedurë mund t’i kërkojë ERE-s, brenda 7 ditëve kalendarike nga data e marrjes së vendimit, rishikimin e vendimit të Bordit në rast se ka siguruar prova të reja që mund ta çojnë Bordin në marrjen e një vendimi të ndryshëm nga i mëparshmi apo për gabime materiale të konstatuara. Për këtë vendim mund të bëhet ankim në Gjykatën Administrative Tiranë, brenda 45 ditëve kalendarike nga dita e publikimit në Fletoren Zyrtare.

Ky vendim botohet në Fletoren Zyrtare.

KRYETAR
Petrit Ahmeti